

续宏简录

續宋簡章

自序

古人之著作已傳矣不必定無瑕類之可議得後之人起而釐訂之以成一家言則亦爲功於古人此學者事也祖宗之志事有待矣或限於時勢之未可爲得後之人起而繼續之以完未竟之緒庶幾慰望於祖宗此子孫責也吾祖弘毅先生弘簡錄一書前接夾漈鄭氏通志肇自李唐迄於趙宋而遼金附載之至於元史則以爲昭代所修未敢議及而期於克肖象賢之子孫叙述之末惓惓於此遠自少時受讀卽有志續成焉自祖錄重校鋟行後每乘其餘閒肆力探討先取本史爲梗槩而廣蒐諸家之纂輯以

正其事之外迂辭之繁複人之乖錯義之駁雜而於有關
治道有裨心學者增其缺略潤飾大觀都門退食常日手
一編挾訛鉤要歸里以來益復杜門潛心甚至積瘁成癘
宛轉床蓐間慮不得竣事以卒始志故每力疾編摩逾深
策勉屏酬酢之煩窮日夜之力自草創以至授簡中間稿
凡四易較之幼時習制舉業暑雨寒燈鑽研故紙弗輟爲
更苦然一人耳目心思之用所及容有未周雖極詳究盡
善而半生精力已與筆墨俱憊則有所不足於前人而妄
叅其見者未必不爲後人所不足也昔賢謂不讀盡天下
書不可輕議古人又謂真能讀盡天下書者自知古人不

可輕議三復斯言著書之不易易良可知矣考元史一百五十八卷明洪武初奉敕監修則有宋潛溪輩若而人孝衆著作之手尚有差謬况材識謏一而欲以一人之智力求免於後世之譏彈詎不惑哉宋王荊公以歐陽文忠修五代史而不修三國志屬蘓子瞻足成之子瞻固辭不肯爲意以網羅數十百年放佚舊聞其中不能無小得失正畏人之掇拾其後耳遠不敏萬不及古人特以吾祖之望於後人者甚切雖不敢自許象賢而夙深繼續之志竊幸是編得觀成於有生之年而無貽不及卒業之憾也用是付諸剞劂藏於家以示後起者冀世有述焉若曰有功古

人而可問之世則益凜乎稱不敢矣

賜進士出身中憲大夫詹事府少詹事前翰林院侍讀學士
日講官起居注提督江西學政內陞光祿寺少卿纂修
實錄會典平定方略大一統志明史諸書浙西邵遠平謹識

凡例

一是編義取續錄發凡起例祖法昭然辭無可贊但元史本文
既不分類又不依時先後倒置不得其解今特窮波討源如
理勞絲務求有緒覽者須先觀本史方知是編之苦心至史
貴詳明故自正文而外間採羣書或補其闕畧或辨其異同
倣大唐六典杜氏通典格竝用夾行小註不敢臆鑿一語惟
是杜門息交討論有闕正恐挂一漏萬有心者諒之
二祖錄帝紀特稱天王蓋謂承天御極始應稱帝自外追尊上
謚義無竝列亦以寓濮王興獻禮無竝尊之意是編於太祖
太宗定宗憲宗止稱世紀睿宗裕宗順宗顯宗竝入系屬明

宗寧宗止於附見不得槩列帝紀以示尊無二上之義

舊史苦於無文惟本紀尤爲率畧蓋緣憲宗以前史官未備實錄無稽故皆年不備時時不備月授受之際中多曠歲世祖以後或紀詳於傳志詳於紀因仍疎忽文亦未能雅馴蓋宋史本紀不載詔令乃襲新唐書之失爾茲編仍準兩漢故事凡國朝典章經世大典及續通鑑綱目紀事本末元文類等書所有詔誥制冊之文與諸帝嘉言善行無不補載至古史以事分見各志故本紀可畧茲編不用志表凡天文地理曆律制度皆按年入紀令人一覽而盡故於本紀獨詳

一祖錄首重宰輔次列功臣明政本所繫國運所關也然宰輔

一官舊史雖有年表亦多脫漏且與紀傳或相舛錯難以爲
憑今自參知政事而上一日入省卽以類從惟有據事宜書
其中賢否自判至功臣一例必繫從龍闢土克復收京始在
茲類其他不敢濫廁蓋宰輔但從其官功臣必序其績也惜
賢相如和禮霍孫元勳如赤老溫皆未立傳無從蒐補再降
將如呂文煥范文虎夏貴等盡獻荆襄淮西諸地始成南北
混一之圖其有功於元不小特爲補傳不沒其實

一侍從臺諫必取其文章華國直節鳴朝方與斯目然旣列其
人必詳其事如郝經之東師議班師議立政議袁桷之國學
議歐陽玄之治河記馬祖常之建白一十五事陳天祥之彈

文陳祐之三大計李元禮之諫幸五臺山陳思謙之銓政四
弊陳祖仁之三上太子書皆炳炳烺烺可傳可誦他如布衣
趙天麟縣佐鄭介夫本非諫官然其金鏡太平二策磊落數
萬言豈非元代絕大文字並加詳載用成鉅觀

一從來修史撰非一手各不相謀重複矛盾在所不免元史於
洪武二年二月開局八月成書順帝旣無實錄遣使採訪郡
縣又明年二月開局七月成書爲期太促紕繆故多如列傳
第一百二十一卷旣載速不台而一百二十二卷又作雪不台
第一百三十一卷旣載完者都而一百三十三卷又有完者
拔都第一百五十卷旣載石抹也先而一百五十二卷又作

石抹阿辛再如第一百二十三卷直脫兒傳旣載從子忽刺
出後又有忽刺出傳第一百三十二卷杭忽思傳旣載其子
阿塔赤後又有阿荅赤傳音字雖殊家世事跡分明無兩間
有旣立傳而重見他傳者悉加刪正至海運爲元時創舉而
朱清張瑄無傳則海道不詳今從諸書摘補庶官之末而先
志以圖竝詳其歷年起運之數以備考證

一舊史后妃雖有傳而甚畧宗室世系諸王公主止有表而無
傳此中脫誤不知凡幾今從全史內以類相次撮合成篇有
諸家所傳互異者竝附參考然亦僅存梗概聞見實屬無徵
誠恐自蹈前車取譏後乘重加增訂尚以俟之高明

一古史但稱儒林至宋始立道學傳蓋惟有宋諸儒刻意倡明道學方可不愧斯名若後此相沿仍襲竊恐實有未副今止稱儒學不名道學蓋儒之爲義至大正不必以道學鳴高也至舊史所載寥寥數行疎畧殊甚今皆搜其生平著作盡爲編入而又補熊禾以下十八人大傳俾六經源流諸史本末無不備具足爲考古者金鑑覽是數篇方知弘而且簡

一自古文人鏤心嘔思或尚論今古或發爲詩誦或留情翰墨不分窮達無非冀垂身後之名而元史無藝文志遂使百年才士抱恨九京今自一統志下及稗乘諸書以至家藏抄本無不羅致特分經學文學藝學三科補其闕軼第惜其人出

處多有未詳然較之藝文志不無少加文采矣

一自古忠臣義士或開疆陷敵裹革沙場或時際艱危致身殉國此在天澤之誼固然更有里巷細民間中弱質慨然捐軀赴難者此乾坤正氣所鍾綱常名教所繫凡有聞見何忍湮沒不彰而元史所載十不得五今特遍加搜采以補舊史之失彼旣不惜一死我敢靳此一書乎靈其有知庶幾無憾

一終元之世創立功德使司所謂帝師國師者僭擬無度累朝錢粟之耗費綱紀之廢弛莫不由此故特詳著其始末以爲防微杜漸之戒其他如叛臣宦官較之往代絕少而庖厨匠作等役雖蒙不次之榮擢列方技之內至元之亡實亡於羣

盜且紅巾諸寇與僞漢僞周僞夏皆先元而亡何以不爲列傳在當時作者止欲歸功昭代不免偏徇今特補入雜行之末以見一代興亡具有原委所關匪細

古史於外國止序一代之叛服事宏其從前緣起皆不詳載史體宏然所以防重複也但一代自爲一傳考古者恒苦緇閎爲勞今於各域皆上稽歷代貫穿成篇且以補祖錄之所未載至元太祖先收西域然後國富兵強世祖先定大理然後順流南伐此有元開國進取中原之大關鍵何可缺而不詳卽如吉利吉思至元初設官分理八百媳婦元貞時屢次喪師亦宜附錄以補闕文

一元人名氏率多雷同其大者有九伯顏一爲世祖時平宋功臣一爲世祖時江西左丞一爲成宗時河南平章一爲武宗時駙馬一爲文宗時左丞相一爲文宗時河南行省丞相一爲順帝時右丞相封秦王一爲順帝時湖廣平章一爲順帝時中書平章十三脫歡一爲太祖五世孫安定王一爲太宗侍臣一爲憲宗時札刺兒部人一爲世祖時福州達魯花赤一爲駙馬术安傳一爲武臣苦徹子一爲成宗時參知政事一爲丞相哈剌哈孫子一爲叛王合丹孫一爲仁宗時西臺中丞一爲泰定時治書侍御史一爲文宗初湖廣平章一爲順帝時僉樞密院殉難膠州十五脫脫一爲烈祖曾孫一爲

憲宗時皇族一爲蔑里乞部長一爲世祖時千戶一爲功臣
劉國傑子一爲功臣木華黎元孫一爲康里國族一爲仁宗
初遼王一爲仁宗時雲南王一爲英宗時南臺御史大夫一
爲泰定時中書叅議一爲順帝時右丞相監修三史一爲順
帝時翰林承旨一爲至正中知樞密院事一爲至正中萍鄉
州同知殉國難覽者最易瞋目特表識之以免混淆

一史家建國紀元務從其實徐無黨於五代史論之詳矣元初
國號未建止稱蒙古開平未立止稱龍岡上都未定止稱開
平至如大都之名始自至元而後其先止稱燕京劉秉忠永
復服改名應曰僧子聰太平未拜相賜名應曰賀惟一程鉅

夫未避諱以字行應曰程文海此定例也再如女真在宋仁宗時因避遼主宗真諱故少加二點後竟訛曰女直回鶻本名回紇至唐元和中始稱回鶻俗音回回元時畏兀兒卽此皆國號所關不得不爲釐正至如刺皆讀喇合皆讀哈阿則本音與倭竝用其地名人名字以音通間多互用今槩從畫一以便循覽幸余少習國書畧知音義故也

一列史皆有論贊以寓抑揚獨宋濂元史以不作論贊爲準春秋之法不知後世之史皆本史漢紀傳非本春秋編年也若夫勝國之史皆與本朝相接豈獨元史爲然而顧用是避忌哉今依祖錄體制各附冊語稍存斷案之義但以卷帙繁冗